

MUNICIPALO

Cado listo vai canta la siéuno, couneissèn la musico, es de paraulo prouvençalo que voulèn...



Prouvènço d'aro

Tóuti li mes, lou journau de la Prouvènço d'aro

Febríe de 2020

n° 362

2,10 €

Charto

Aro que nosto revendicacioun pèr l'ensignamen de la lengo a fa fougasso, fau metre pèd-à-terro.

L'ócasioun se presènto vuei de pas crida tant aut e de s'adreissa au proumier escalon de la demoucracio, la Coumuno, que se n'en vai renouvela si counseié lou mes que vèn.

Sian plus à Paris, dins nòsti vilo e vilage lou mounde es encaro forço estaca à la culturo e la lengo prouvençalo. Aquelo recouneissènço terradourenco pòu servi de trampelin, lou *Couleitiéu Prouvènço* l'a bèn coumprès en counvidant li candidat is eleicioun municipalo d'affirma soun estacamen à soun païs en signant un engajamen, uno charto titrado :

O pèr la lengo e la culturo prouvençalo !
Ansin, d'assetoun o de dre, saupren pèr quau vouta !

Vaqui dounc l'acetacioun dins li règlou founamentalo pèr èstre un bon Maire en Prouvènço, emai lou *Couleitiéu Prouvènço* aguèsse un pau predica pèr sa parroqui, es de bõni Tauro de la lèi :

Amenistracioun coumunalo

* M'engage à crea uno delegacioun à la lengo e à la culturo prouvençalo que sara fisado à-n-un counseié municipau vo à-n-un ajoun au Maire.

Bilenguisme dins l'espaci publi

* M'engage à metre en plaço (o à manteni) de panèu is intrado de ma coumuno emé lou noum en prouvençau de ma vilo o de moun vilage, apausa soutu lou panèu francès.

* M'engage à metre en plaço lou noum di carriero en prouvençau dins ma coumuno.

* M'engage à metre en plaço uno signaletico routiero bilengo francès-prouvençau dins ma coumuno.

* M'engage à metre en plaço uno rubrico vo uno pajo en prouvençau dins la revisto municipalo de ma vilo vo moun vilage.

Educacioun

* M'engage à metre en plaço un bagage pedagogique à destinacioun dis escoulan dóu primàri de ma coumuno pèr facilita l'ensignamen de l'istòri loucalo e aquelo de la Prouvènço, de sa lengo e de si tradicioun.

* M'engage à metre en plaço uno iniciacioun à la lengo prouvençalo pendènt li tèms periscoulàri.

* M'engage, en m'apielant sus lou tissut assouciatiéu loucau, à crea uno "escolo municipalo de prouvençau" à destinacioun dóu public adulte.

* M'engage à metre en plaço uno signaletico bilengo dins lis escolo primàri.

Coumuno de Prouvènço



Art de viéure

* M'engage à pavesa li bastimen municipau dóu drapèu prouvençau "sang e or" au coustat di drapèu francès e éuropen.

* M'engage à sousteni e perenisa li fèsto e tradicioun loucalo.

* M'engage à sousteni la creacioun artistico prouvençalo.

* M'engage à sousteni e à desvouloupa lis ativeta espourtivo prouvençalo (curso camarguenco, targo, petanco...).

* M'engage à utiliza li circuit court pèr sousteni li prouducioun agrico, artisanalo e endustrialo prouvençalo emé pèr fes un menut prouvençau au restaurant escoulàri.

* M'engage à ço que la lengo prouvençalo siegue presènto dins la comunicacioun de l'Ofiçe de tourisme de ma coumuno.

Soustèn à l'Óusservatòri de la Lengo e de la Culturo Prouvençalo

* M'engage à ço que ma coumuno siegue aderènto de l'assouciacioun *Couleitiéu Prouvènço* pèr fin de sousteni l'acioun de l'Óusservatòri de la Lengo e de la Culturo Prouvençalo.

Tout acò aprouva, s'es leissa uno plaço pèr bouta en apoundoun uno proupousicioun de mai.

Malurousamen lou proumier eisèmplo que s'es baia mostro, à bèl èime, lou chauvinisme esclusiéu, moun vilage es pas toun vilage, lou chascun pèr se, d'uno Prouvènço divisado.

Lou signatàri apoun en francès chanu : *"Je m'engage à ce que le Pays d'Arles, son identité culturelle et ses traditions ne soient*

pas (des)intégrées au sein de la métropole Aix-Marseille-Provence. Cette intégration contrainte et forcée altérerait gravement notre culture spécifique."

Lis Arlaten que rèston, pèr forço, à Marsiho, tant noumbrous coume li Corse, an qu'à de se teisa, an perdu l'identita culturalo arlatenco de l'avejaire d'aquéu futur elegit municipau.

Quand l'interès parèis, l'amista fuso coume dis lou prouvèrbi de la culturo especifico d'Arle.

Basto ! Acò apouncho pas un fust.

Ço qu'es lou mai de cregne es l'abileta dins li proumesso eleitouralo que fan flòri culturalamen parlant e la benedicioun di candidat lipo-quiéu avans soun eleicioun, lipo-sòu, après, mai tant pis, rèn que la leituro de la Charto sara benefico pèr éli, l'esperan !

Espousicioun Jan Giono

L'escrivan de Manosco es à l'ounour au Mucem de Marsiho.

Pajo 6

Mas-Felipe Delavouët

Souveni de noste grand pouèto prouvençau pèr soun centenàri...

Pajo 3

Uno istòri di lengo

Trouba l'espelido di lengo dóu mounde sènso óubli-da la nostro...

Pajo 2